



5. marts 2010

UPA 2010/46

Inatsisartut Suleriaasianni § 35 naapertorlugu apeqquteqaat tunngavigalugu oqallisissiaq imaattoq matumuuna saqqummiuppara:

**Imaatigut angalasinnaanermut akuersissummik allagartaqartalernissaq aamma angallatit mikinerusut atorlugit imaatigut angalatilluni sillimanissamut pisariaqartunik peqartarnissaq pissappata suut suliniutit aallartittariaqarnersut pillugit apeqquteqaat aallaavigalugu oqallinnissamut siunnersuut.**

(Inatsisartunut ilaasortaq Andreas Uldum, Demokraatit)

### **Tunngavilersusuut**

(Biiliniq ingerlatsisinnaanermut allagartap assipajaava)

Kimilluunniit apeqquserneqarneq ajorpoq, biilisagaanni biilersinnaanermut akuersissummik allagartaqartariaqarmat. Aamma arlaannaataluunniit apeqquserneq ajorpaa inuutissarsiutigalugu biilersinnaanermut allagartaqartariaqarmat, taxa-rtarniaraanni. Aamma arlaannaataluunniit apeqquserneq ajorpaa biilersinnaanermut allagartaqartariaqarmat lastbiliniq ingerlasisuuniaraanni.

Tamanna tunngavigalugu eqqumiiginanngitsuunngilaq, kinaluunniit umiatsiamut ikisinnaammat angalaarlunilu. Atuagarsornissamut umiatsiaaqqamilluunniit ingerlatsisinnaanermut misilittagaqarnissaq piumasaqaatigineqarneq ajorpoq. Oqaatigilarali, amerlanerpaat akisussaassuseqarmata paasiniaalluaqqaanngikkunillu sungiusarluaqqaartarmata imaatigut angalaalertigatik. Aamma amerlaqisut pikkorissartarput naak piumasaqaataanngikkaluartoq.

Ajoraluartumilli imaatigut angalaarniarluni umiatsiamut ikiinnartarneq kinguneqarnerluttarpoq. Ukiut tamaasa tusartarparput qanoq amiilaarnarsinnaatigisoq imaatigut angalaarneq. Demokraatini qularinngilarput imaani ajunaarnerit pinngitsoortinneqarsinnaasut, piumasaqaataasuuppat imaatigut angalasinnaanermut allagartaqarnissaq.

Akisinnaanngilarput, imaatigut angalanissamut akuersissummik peqalissagaanni suut ilisimasariaqarnersut, isumassarsiaqarpugulli neriuppugullu oqallinnerup ingerlanerani aamma immersorluarneqarumaarluta.

Pingaarnarpaamik soqutigisarput tassaavoq sillimanissaq sapinngisamik pitsaanerpaatilerinissaa. Tassa imaappoq, inatsisitigut piumasaqaataasariaqarpoq angalaassagaanni atortut makku pigineqartariaqartut:

VHF-radio, GPS, qummoroortarut, ikiueqqaarnermi atortut, atisat puttatit inersimasunut taavalu annaniutit meeqqanut. Tamatuma saniatigut ilisimaneqassaaq makku qanoq atorneqartassanersut.

Ullumikkut pikkorissaasoqareerpoq pineqartut atornissaannut pikkorissaasinnaasunik. Demokraatini kissaatiginngilarput, landskarsi akiliissasoq, imaatigut angalanissamut



allagartartaartarneq atorneqalissappat. Imaatigut angalasinnaanermut akuersissut allagartaq atuisut tamakkiisumik akilertassavaat. Inuit pikkorissarnerit assigiinngitsut pereerlugit pisariaqartunik ilisimasaqalersimasut, soorunami pikkorissarnernik uteqqiissanngillat, periarfissaqartariaqarporli allagartaminnik assigisaannillu imaatigut angalasinnaanermut allagartanngortitsisinnaanissaat.

Taamatut oqaaseqarluta Naalakkersuisut akissuteqarnissaat kiisalu partiit allat saqqummiussassaat qilanaarluta utaqqissavagut.